

# UUT'T OLDE VODDEN

't Is al een hele tied eelen  
Wat ze tõe in Vodden deen.  
Zee wollen de mense leern.  
Um zich te organiseern.  
Dan wodden t better dat zoj zeen!

Alles doon meer met mekare  
Dat was toch wel ut ware!  
Iej mossen ok andren meer  
verdragen.  
Ze vonnen as tat zol slagen.  
Vedween een hoop van tnare.

Door waarn zo vølle dinger zwoor.  
Met de beste wille kon iej door  
Allène vake neet tegenop.  
Moor met een grote trop  
Spølden iej dat better kloor!

Al kregen ze met ut huusbezeuk  
Ok hier of toor wel us een deuk.  
Ze redden ut; en de Boerenbond  
Dee'kwam toe van de grond!  
Dat vonnen ze toch moor leuk!

Het wodden een soort cooperasie.  
En toe hebt ze met wat stasie  
Dee bond een name e geven,  
En toe is dee in e schreven.  
As een soort onderdeel dr nasie!

Dee bond, ut was een onderlinge  
Deed heel vølle goeije dinge.  
Ze kochten noew ok goedkoper in  
Dat gaf toch lekker moor gewin  
Iets woor ze trots op ginge.

Ze leern mekare ok better kennen  
Al zat trok wel us één te jennen  
Zee konnen goed samen överweg  
En t mot wodden e zeg  
t Begon gaw al aardug te wennen.

Toe kwam der ene opt idéé,  
En zie; noew mosse wiej temee  
Ok us met mekare uutgoan,  
En twerk een dag moor loaten  
staan.  
Door kreeg hee der vølle in mee!

Toe de kōppe waren e teld  
Hebt ze een dag vaste e steld.  
De meeste luu dee wollen graag  
As t effen kon dan noa Den Haag!  
Door waarn ze noa över e held.

Ze gingen dee dag met te TREIN!  
Ut draaiden wel n betjen in eur  
brein!  
Iej konnen t moor nooit wetten!  
Somgen hadden dr nog no nooit in  
e zetten,  
Eur hartjes wodden wel wat klein!

Moor ze heelden zich toch groot!  
Ene zei: ie mot toch éénmool dood!  
As iej t zò noa veuren brachen  
Mossen ze dr toch wel um lachen!  
Al zat in de schøene nog lood.

De meesten van eur deden moor  
Of ze bekend waarn met de spoor.  
Ze hadden int reisjen ok wel zin  
Dus stapten ze man-moedug in!  
Al trilden binnen een snoor!

Zon reis was toch wel fijn  
Ze vegatten al gaw magre Hein!  
En met een flinke prøeme tabak  
Zatten ze al meer op eur gemak  
Met lōsse hande in de trein.

Zee veulden zich gaw hele bāze  
En kekken deur de trein zien glaze  
Noa t vebiejgònd land en bos  
De tonge kwammen ok al los  
Moor twas mees moor gedaze!

Het duurden wel een hele tied,  
't Was tan toch moor slim wiedz!  
Moor ze mossen noew neet vitten  
Want zee konnen der bije zitten,  
Zwoor werk was tok weer niet!

Zo kwammen ze dan in Den Haag  
Moor veulden toe een slim  
geknaag  
Op te plaasse woor eur māge zat!  
Ze wollen één of ander nat  
En zéker gin hunger liēn vandaag!

Door zaggen ze een groot hotel  
Zon slim mooi dink dat leek eur  
wel  
Een hotel zo as tat door steet  
Zo ziej ut bije ons neet  
Dan is Vodden toch moor een drel!

Dus smoksten ze der moor gaw in  
Want zee hadden vølle zin  
De dors begon ech te kwellen  
Doorum moor gaw bestellen  
Dan was tit een goed begin!

Kollesaal wat wast binnen ok fijn  
In alles zat 'n beschaafde lijn!  
En dekkens op de vloere!  
Somgen van onze boere  
Veulden zich toch wat klein!

Door leepen n stel zwartjasse,  
Want twas toor alles klasse!  
t Waarn der zeker stuk of zes!  
En déé vonnen dit neet zo bes,  
Dee boern met eur zwatte dassel!

Zee heurden ok dee boereproat

En zatten dr wat met in eur noad!  
Dat stel was lange neet deftug  
Ze wodden ok een betjen heftug  
Zon stel dee de zaak hier kwoad!

Toe nam zon kelner ut lef,  
'k Gleuf dat hee was de chef  
En dee sprak effen dee boern toe  
Ut wodden een wat gek gedoe!  
Hee proaten van besef!

Hee zei: mensen beseft u wel  
Dit is een HEEREN-hotel  
En ik weet zeker en sekuur  
Het is voor u hier veel te duur!  
Moor toe wast compleet een rel!

Zee kekken effen noa mekare  
En veulden dat ze hier ast ware  
Slim wodden gedegenereerd!  
En dat veel helemoal verkeerd!  
Dan hadden ze an hun een rare!

Beernt Fok van ut groot hogehoes  
Dee lōe door toe met zien voes  
Zó hard dat ut knalden  
En deur dee ruimte schalden  
De toafel hoas tut moes!

Hee zei: wat dach iej wel  
Dadde wiel bunt moorn stel!  
En dadde wiej hebt gin geld!  
Hee gebruikten meer geweld,  
En gaf de toafel nóg een lel!

Ik zegge oew: breng op!  
Veur disse hele trop,  
Wat ter ok wod besteld  
Wiej hebt meer as zat geld!  
Breng op! en noew in een galop!

Dee kelners lépen toe heel had  
En brachen gaw alle boeren wat!  
Ut was compleet toe hollen  
Ze konnen kriegen wat ze wollen!  
Wat te etten en ok nat!

Zee hadden dus moor mooi belet  
Dat ze door wodden uut e zet  
Ze hadden t bes noa eur zin ehad  
Noew hadden ze veurlopug zat!  
En de rekkening veel had met!

't Is wieter alles bes egoan  
Zee hebt dee dag van alles edoan!  
. Moor mien papier is al weer vol  
'k Zeg effen nog; ze hadden vølle  
lol!  
'k Mot hiermet dus volstoan.